

樂安縣續志

上



樂安縣志序



序曰邑志之脩豈為山川道
里建置沿革已哉邑之有志
猶國之有史國史之文獻在
天下邑志之文獻在一邑史
與志大小雖殊所重在紀言

紀事風旌勸來則一耳樂安
縣隸於青州巖邑也古千乘
地在昔歐陽生兒寬並以尚
書傳授顯名漢庭而邑於是
乎重迄我

朝列聖作人若闡侍御之骨體

蔣侍御之經濟李太僕之經
術項背相望而邑於是乎益
重不有典籍歲益湮漉今尚
友者至考前詰嘉言懿行於
斷石荒壠間不亦千乘之缺
耶舊志草創於成化間沈令

清而太僕夢虞李先生績承
而光大之間讀其所論水利
論土化論荒施論馬政論物
產風俗論經術藝文射圃文
行等鑿々典確可見諸行事
均有裨於士習民生之太其

則是先生之大有造於乘也
即余之司李嘉禾絕干請却
幕金者先生教也歸來足遠
城市杜門靜坐者先生教也
後之人皆當以先生為法或
曰先生往矣後生小子奚所

據而法焉曰法先生之諫議
當求之倫常疏法先生之名
節當求之崑崙集法先生之
理學與吏治當求之消間烟
鑒二錄庶幾其識先生之心
歟庶幾其識余序邑誌之心

歟邑有與先生同以理學諫
議著者曰孫公松石以孝子
義士著者曰孫公悔庵皆邑
人所重故並序及之噫謂余
之序邑誌可也謂余之勸邑
人亦可也邑人勉乎哉

賜進士嘉興府推官邑後學尹
從王薰沐書

樂安縣續志序

余旣梓舊誌成謀續焉僉謂邑
前志自愚谷尚矣蔣孝廉輩以
例改纂之今我侯文章治行系
自廬陵煌煌巨編不啻愚谷而

續孝廉輩爲也異哉所聞余曰
不然語有之不有後勁母慮前
矛自癸卯至今六十年科目政
績倍之前文苑武胄倍之前士
大夫盛德大業焜耀宙合倍之

前恭值

興朝熙洽

聖天子赫然式臨與寓內更始曩
爾海邑將沾新化焉余於孝
廉輩志蓋欲別之匪僅續之也

於是鄉紳孫三錫輩茂才唐生
德晉等踴躍襄厥事適浮玉織
水兩李子家居昇卒業李子辭
再三余曰脫聽子辭儻有以福
先寺故事責于者奈何旣受事

李子曰昔龍鬪馬山之陽仲父
惕而脩政朝夕必書茲邑爲栢
寢於臨淄其近地也水旱災祥
損益得失昭然炯鑒余曰是宜
署紀年志廣固之墟北流浩浩

織水附焉合入權口榮爲車馬
之瀆今則異矣余曰是宜署河
渠志冠之鞞鞞化而爲鷓馬之
駢駢馴之爲駒余曰是宜署風
俗志勻勻原隰勾股斯度紘紘

繡版畫一斯製余曰是宜署戶
口田賦志一命之褒自庭台背
之杖於國酉陽之叢鬱鬱光華
走集之賈附於東秦余曰是宜
署地封耆碩藝文市廛志莪莪

泮宮臯比之趨西門嘉績百世
攸垂燦燦人群售於宗伯余曰
是宜署學校秩官選舉志黃澤
之謠熙矣鹿皮之惠百世其昌
余曰是宜署名宦鄉賢志瀧崗

原自廣饒洋織愚谷支脉崇崇
余曰是宜署丘墓志茸棠之歌
社鼓其叢庇我乘人厥今不替
余曰是宜署宦績傳歐陽兒史
之後儒術泯闕性道弗彰惟侍

御成公絕學之續得自遺經白
沙新建並爲一流余曰是宜署
理學傳國是叢脞僉壬登朝其
有亢昌言引大體循聲溢關右
如孫給諫其人余曰是宜署諫

臣傳臨淮忤璫昌黎守狷鎮南
服官著績清白貽後孝廉恪共
謙退長者之稱日以歸焉又曰
白馬聲高樂亭長沙弗溺其職
余曰是宜署事功傳聞不枉車

驥不走閭東臯王官谷遯跡已
余曰是宜署卓行獨行傳河間
元文奮功東陽劇國王猛建業
咸原楚材晉用匪自今矣余曰
是宜署外徙傳闕疑守殘儒者

家法然信則補誣則正亦毅然
所弗奪余曰是宜署補遺傳青
陵之臺娥江之浹乘之女子是
效是則余曰是宜署列女傳礦
山之捷執訊獻馘用震師旅以

啓其後余曰是宜署武胄傳著
琬琰泐金石光榮之業昭於齊
門自大拙瞿堂以下取法焉余
曰是宜署文苑傳賢而能善而
動衆外媿程鵬內宗元晦斯可

以砥末俗余曰是宜署孫封公
建置紀事備矣余於是肅然起
謂李子子先大夫少厲聖賢博
載籍入仕版恪乃王家爭挺擊
水西案廬太恭人墓次諸懿跡

章章已忠孝之歸乘人宗焉子
先太守兄以鴻文繼愚谷以惠
澤流江表以直聲徹郎署是宜
署子先大夫曰藩臣傳太守公
首事功傳中李子乃避席逡巡

曰固也不敢請爾咸屬筆適遠
方人以侍御公理學傳成公三
世儒行傳亦續次至入其中而
志成余不佞乃拜手而綴言曰
嗚呼邑誌之後不綦艱哉然乘

爲先博士司徒弓禡地余於乘
窈有桑梓之意也語曰前脩隳
如後進悚如今隸在職方戶產
人才余所有事也故不得已而
謀梓人又念我先文忠公著唐

書五代史廖氏譜善善長惡惡
短之義直逼古史矣之奇輩尚
有遺議矧余乎今以往罪知之
口聽之衆矣匪余所恤也已

大清康熙六年丁未仲秋日

賜同進士出身文林郎知樂安
縣事楚潛歐陽焯賓霞父謨



樂安縣續志目錄卷之上

紀年

河渠

風俗

戶口田賦

地封

耆碩

藝文

市廛

學校

秩官

選舉

名宦鄉賢

丘墓

援例

樂安縣續志

紀年總論

太史公史記兼左右體編年以誌其要紀傳以覈其
跡災祥水旱得失臧否所以自鏡也後世譏郡邑誌
盡廢右體至激有滁陽隋州誌之例最苦煩俗質之
前册寧無覩目哉余故列紀年誌于首

萬曆三十一年癸卯 知縣孟楠在任 脩學宮

新寅賓館土地祠

邑人

李含章
李煥章 撰

三十二年甲辰

三十三年乙巳知縣廉有象至 蝗災

三十四年大括地 審編

三十五年丁未 有秋

三十六年戊申

三十七年巳酉

三十八年庚戌知縣陳秉良至 審編

三十九年壬子知縣許邦興至

四十年辛亥知縣陳來賓至

四十一年癸丑

四十二年甲寅知縣張文熙自東阿調繁至 秋水

四十三年乙卯知縣丘程雲自蒙陰調繁至 大饑

人相食人民遠徙他方上遣使賑濟御史過庭訓至

四十四年丙辰 大疫 知縣楊名時至

四十五年丁巳 奉文捕蝗三百石准充生員

四十六年戊午 彗星見東南三月方滅

四十七年巳未 有秋 增餉

四十八年庚申 秋大雨雹 知縣門洞開自文登

調繁至

天啓元年辛酉 地震

二年知縣胡克開自新城調繁至鄒滕警城守戒嚴

三年癸亥

四年甲子大括地 嚴禁火耗驛遞洋水脩李家橋

五年乙丑知縣黃鎮元至

六年丙寅 秋大水 蝻至

七年丁卯 秋大水

崇禎元年戊辰

二年己巳裁縣丞 知縣高任至

三年庚午

四年辛未 春日赤 夏旱青州道右布政使常道

立分濰州邑至縣 大雨雹 秋大水 秋逃兵陸

洪等數十騎自利津來入境南去冬逃兵四十騎過
城下東掠宋家店而去臨清都司張孔夢以兵至
五年壬申青州守備秦希孟以兵至增西城外門

供應米豆 覓民兵脩沿城牛馬墻

六年癸酉知縣呂業至 李大叅脩草橋鎮石橋鍾

大司空碑記之

七年甲戌 審編

八年乙亥 邑人李大叅孫寺丞修敬一亭李大叅
建文筆亭東南城上 建書院俱燬

九年丙子

十年丁丑知縣朱芾煌至 課士立文社刻觀齊集
十一年戊寅知縣朱芾煌修城四角敵臺 立塘頭
寨營房 增修鼓樓今燬 知縣潘必鏡至

十二年巳卯濬城河中多沙石類山巒人物之狀

十三年庚辰濟北饑民至邑 立粥廠闔邑士大夫

輸米賑饑 知縣喬尚質至 增賦

十四年辛巳督運戶部郎中沈廷揚至 運米汀河

十五年壬午太白經天 城陷

十六年癸未知縣朱朝燧至 知縣張直講自招遠
調繁至

大清順治元年甲申春三月晝晦邑人

大清 偽官王天錫逃 知縣張弘猷至 流寇趙

應元掠卧石村南去供應濟寧米豆

二年乙酉知縣張弘猷新聽政堂 葺城隍廟 大

括地 審編 始置梁兵

三年丙戌 秋水

四年丁亥知縣蔣元彥至 夏土賊張介石陷城劫
庫藏知縣蔣元彥死之先是城頭刀鎗皆有火光人
驚散城旋破雨四十日不止大水傷稼知縣張暉至

五年戊子 賊首張介石伏誅

六年己丑春山寇掠邑邑兵邀擊之大創去

七年庚寅 大括地

八年辛卯知縣鮑鳳仵至

九年壬辰 龍鬪于城西北明家庄天雨有赤黃數

相擊搏碯碯有聲 大水 修葺城工

十年癸巳 有麥

十一年甲午 審編 大雨雹 新學宮孫三錫修

知縣鮑鳳仵捐俸修大成殿廩生唐德晉生員孫弘
敬協修 孫三錫建學東齋堂坐落儒學東置贍士

田大地五百畝坐落壽光界有碑記在學贍族田大
地五百畝有碑記在學

十二年乙未知縣蕭永華至 運濟米豆

十三年丙申 膠兵叛城守戒嚴孫三錫捐銀煮粥

賑饑

十四年丁酉 知縣黃甲雲至

十五年戊戌大括地行田字坵法 知縣章志尚至

十六年己亥

十七年庚子知縣章志尚捐俸修四城門樓 置漏

澤原城東三里替孫三錫立社倉

十八年辛丑

康熙元年壬寅解東征米豆 孫三錫立義渡

二年癸卯知縣張莘至 詔免練餉

三年甲辰知縣歐陽焯至 春旱齋誠率紳士里民

步禱三日雨大降霜傷稼 冬彗星見兩月方滅

四年乙巳春彗星復見 旱井泉竭無麥 詔盡蠲

本年稅已輸者留抵五年 遣使賑濟人各銀四錢

秋大雨雹傷秋禾城西南尤甚 孫三錫捐米千石

五年丙午 旱無麥 始置巡海大人督察沿海州

邑脩關聖廟邑人孫三錫拓地二畝築垣墻百堵有

餘孫三錫修建廣才橋周公祠坐落齋堂東 捐銀
修孔林 宋金聲修城隍廟大門二門更遍修城內
外各廟神像 同修廣才橋賈興隆 艾三鳳
至六年丁未知縣歐陽焯蠲俸葺城隍廟邑人孫三
錫劉毅志孫弘敬宋金聲等出貲倡始士民爭趨之
大雷雹 秋大雨溜水溢至城東門 有秋 修建
西門橋生員宋金聲出貲建邑稱便

知縣歐陽焯捐俸修鐘樓

修城隍耆老 李汝金 賈興隆 焦家聚 董可

法 孫近道 崔士行 禹弘猷 李懷成 王璿
畢周柱 張尚斗 孫起華 蔣大生

論曰或曰春秋紀災不紀祥誌何以並列也曰昭天
道也視聽廣莫照臨下土不以乘蕞爾遺焉或曰春
秋兼美刺誌何以專紀善也曰重里閉也詩不云乎
惟桑與梓長者之行貽之後人斯亦足以風矣若褒
貶之法則史官存

樂安縣續志

河渠

山川國之紀綱乘平衍僅五水率伏行細流清少任
舟楫薪醴通焉澠洋女饒蒲葦灌溉之利頗爲民便
淄善溢然入新誌無大徙而女復古道而北洋失故
道而東女猶因勢利導洋則豪民盜決自利爾滄桑
易位豈不以人事哉

樂安縣續志

風俗

邑瀕海瘠鹵民務耕桑中歲兢兢不給青北偏窮處也然士大夫矜名節而多建白士朴亮民戇直曩耳食者不察以險健目乘或時會偶然非邑俗之通論也入

本朝前後諸牧長所休養蒸蒸復古至魯至道惟在嘉惠元元者爾

樂安縣續志

田賦戶口

昔太公治齊地鹵蕩人民寡邑承臨淄下委殆所稱
海濱廣斥者耶民務桑麻而鮮販殖任土作貢乃視
他邑獨重民數困于賦入矣向分等則民頗苦煩錯
不均自康令一之稱便然寓撫字于催科節勞佚以
勸子來恃有龔黃卓魯其人在

原額不分等則人丁四萬二千六百一十一丁除逃
亾人丁二萬五百九十一丁內

順治十二年至十六年新增人丁九百二十二丁

康熙二年新增人丁三百七十丁除逃亾人等一萬九

千二百九十九丁見在并新增人丁二萬三千三百

一十二丁內除鄉紳舉貢生員優免木身丁四百六

十四丁免銀六十九兩六錢

實在常差人丁二萬二千八百四十八 實徵銀三

千四百二十七兩二錢

原額田土不分等則一例地八千四百九十九頃二

十八畝四厘三毫五絲

除荒地一千三百五十七頃七十畝三分六厘內至

順治十二年至十六年墾地三百三十三頃二十七畝

二分五厘

順治十七年起科開墾地六頃九十畝八分四絲

康熙元年起科開墾地三十頃六十二畝八分一厘六

毫

康熙二年起科開墾地一十六頃三十六畝一分五厘

四毫

康熙三年起科開墾地一百四頃三十二畝七分八厘

四毫

荒地八百六十六頃二十畝五分五厘五毫五絲四

忽四微

成熟并開墾地七千六百三十三頃七畝四分八厘

七毫九絲五忽六微

廢德藩欽賜原額成熟籽粒地二十一頃二十二畝

六分五厘

又報額外查出廢德藩地七頃八十七畝五厘

原額芟草地六百六十二頃七十四畝

除荒地六百五頃一畝內

查出芟草地二百九十四頃九十六畝九分五厘

康熙二年起科開墾地六十八頃四十畝

荒地二百四十一頃三十三畝五厘

成熟并開墾地四百二十一頃九分五厘

又成熟芟草地一十二頃二十六畝

原額額外荒田地三百一十五頃二十畝三分

除荒地一百九十五頃四畝五分六厘七毫六絲七

忽

順治十七年起科開墾地二頃

康熙元年起科開墾地三頃一十九畝

康熙三年起科開墾地九頃四十一畝八分八厘九毫
荒地一百八十一頃三十三畝六分七厘八毫六絲
七忽除免銀

成熟開墾一百三十三頃八十六畝六分二厘一毫
三絲三忽

以上丁地共徵銀四萬六千八百八十九兩九錢三
分六厘八絲六忽四微若一切起運存留款項倉口

一遵欽定全書俟丁地足額確爲募列

論曰任土作貢計衆役民三征之興所以佐國用勤
子來也乘邑於海岱之間寓貢青州之野田上下而
賦中上古所稱泱泱大國之遺哉然戶勤農桑家習
錢鑄鹽鹺之利被於海濱合是將無本業也但阡陌
不能無肥瘠鹵瀉不同於上腴

朝廷計所獲之厚薄定所入之重輕故正稅之外而有
官庄有芟租有灶地詎不井然有條哉今則避正供
而成冒官灶城村沃壤成田叅於污萊有 上請焉

而已失其原者邑數疲於額矣釐正休養良司牧之
功顧不重與至于戶口

清朝二十餘年所蓄息計當林總充溢趨事樂誠應乎
馨鼓之節當無脫大農之版者矣

樂安縣續志

馳封

乘自太僕公官至三品者太叅公大叅公又以侍太
恭人養弗與三載考績亦僅用四品秩贈封及父母
爾後卽有珥華薦豸守大郡直蘭省陪侍從者率一
命再命不獲列金緋入本朝則闕如矣然壘書煌煌
恩及錫類所以廣孝也後之服家守官膺寵命之休
者當奮然興矣

李尚思貴州叅政中行之父贈中憲大夫鎮江知府

李生香荊州知府楫之父贈奉政大夫刑部郎中
孫儒忠太僕寺丞三傑之父封文林郎寶雞知縣
成可訓南京御史勇之父封文林郎饒州推官

陳 書戶部主事可薦之父封文林郎長子知縣

連守度鎮南知州鴻臚少卿士英父奉直大夫晉階

朝列大夫

李叢芳係知縣鳳翥父文林郎樂亭知縣

孫三錫弘治父封文林郎廬江知縣

張 琢商州判官繼華之父封營繕所副修職郎

項汝變所吏目封登仕佐郎

樂安縣續志

耆碩

齒稱達尊自子輿氏授几杖養膠庠其義不可不重
志耆碩

蔣詩年一百二歲

符仁年一百歲

孫纘年九十九歲

徐汝陽年九十八歲

景文卿年九十七歲

劉九峯年九十六歲

張錦年九十四歲

門堂年九十四歲

宋夢吉年九十四歲

李統年九十一歲

宋懋修年九十一歲

張守忠年九十歲

鄧携攀年九十歲

李冬令年九十歲

王尚木年九十歲

李湛年八十歲

連守典年八十二歲

王冠年八十五歲

王家藩年八十二歲

孫三畏年八十六歲

蘇度年八十四歲

李安年八十六歲

馬爵年九十歲

論曰子讀宋史乘東鄙張贊獨孤用和給助教告身

守刺史成以賓禮見雖其澤躬優也豈非以其享大
臺臻台背哉乘諸人精呼吸勤寤寐以踐于希齡斯
可稱百年人瑞矣故列其姓氏如左

樂安縣續志

藝文

乘文獻言尚書自歐陽生兒生漢以來稱最近年家
懷蘭芷人握靈蛇鴻文巨編其關於栢寢之墟者比
比也

兒御史大夫寬封禪頌 李才弔銅雀臺詩二首遣
興一首入詩雅

成侍御史勇消閒錄十卷 孫寺丞疏稿

李大叅中行澠溪草四卷 五宜亭集一卷

黔中疏一卷 丙子陳言疏一卷 同善社約一卷

刻孝經解一卷 東臯賦一卷

李知府楫河洛禹貢解二卷 徐文學振芳三素草

一卷 喝月艸一卷 雪鴻草一卷 楚萍草一卷

淮海遺集一卷 蔣孝廉奇鑄邑誌

孫封公三錫刻學庸或問有敘 訓蒙大義有序

社倉記有序 張文學孔教四維邑誌

張孝廉所好選宋元詩六卷 逸稿

與崔后渠書 邑人李舜臣太僕卿

舜臣啓爾雅當為釋經而作竊意爾雅滯于章句說

文滯于邊旁有所長者有所短與漢儒務存爾雅又

于爾雅有滯者焉宋儒漢訓有不必偽又薄爾雅說

文不信而信近傳廣韻增韻第三第四義焉字學不

明于義安取大篆已降况秦隸乎今用秦隸訓古聖

人文豈不遠哉且孰非說經而漢儒執禮過嚴于義

反陋宋儒說理過詳于言反淺尊裁幸甚

愚谷集序 王世貞刑部尚書

和長輿目潘安仁拙于用多多矣安所稱拙為也蓋

世貞嘗北游燕代間觀勒習兵諸將所合者以萬計老幼間之金進鼓退坐起挫節旌旗之色全然蓋西乃有新秦之卒三千其騎組步如繡勁弩布前長戟距後衆目一麾衆耳一鼓卽卒然而陵之而未易敗也夫以萬人計而中精之三千足也然不能加三千人三千人而萬人之用在也世固有巧用其少者李先生爲文章號稱名家數十年吾不知其所由庶幾龍城氏之風哉夫以李先生爲文章號稱名家而斷不敢以其才而溢先民之注意至而言意竭卽止大

要不使辭勝意如此諸後生少年剽略而博綴緝而華者將將無少李先生乎哉李先生詞語體裁約之簡粵而指事類情各極其則誠少且巧矣余故序其遺文而梓之李先生諱舜臣字茂欽號愚谷舉進士禮部第一常爲吏部爲國子師爲太僕卿矣以彼其才輒斥補外最後遂廢不用其于官恬靜自好如其文云

愚谷集序

周亮工戶部右侍郎

太僕公舊爲吾鄉學使者與空同爲二李坎坎鼓歌

彭蠡之墟迄今未已也暨讀錢宗伯牧齋盧侍御德
水所著書太僕公又與章丘中麓氏爲二李最後余
宦廣固往來愚谷下因求太僕公所謂愚谷集卽覓
段柯古書於臨淄南郊之邸不啻公邑人以其集來
燈火危坐書卷迎人爽鳩之游不虛矣象先過吾署
稱邑有三文君子兒內史寬任人守昉太僕公兒內
史著述不多見明堂三頌顛碧山之紕彥昇浮沉人
主駢麗自好王粲陳琳之靡靡者爾弇州謂太僕公
固名手然體製纖小當永嘉盛氣舉朝柳轂自愚谷
遂授邑劉君毅志朱霞梓之

李封公墓表

隗 銑禮部侍郎

公壽光劉君西橋逸事狀出天下咋舌文孰鉅于此
則太息以泣其子文忠公修以文冠南省遂倡爲古
文繼韓子天能酢善也已夫子贊易五陳刑矩於大
象豈非曰民命攸繫一成而不可復耶封君李公山
東樂安人諱鉞字大器少起刀筆間然雅好禮讓教
其子若弟必以是曰人倫之紀在禮失之與物奚別

焉居親喪奠虞禫禫必度而行有婆姑迎而養之且
字其孤弁而婚公後爲饒州司獄乃自矢之曰惟賄
亂獄惟踈佚獄惟刻以庸敗獄又曰法如衡焉過斯
虐退斯縱潔吾先焉豈有法衡哉饒人稱公却囚貨
嚴囚繫奠囚居時囚飲食大寒酷暑囚無病死者嗟
乎向令公掌刑豈復有寃濫哉其諸禮讓之推乎公
有少子曰舜臣溫慎有學登省第如文忠公在吏部
遇 頌恩封公稽勲王事公大書夙夜在公四言以
訓疾革誨之曰忠公易簣都下考功馬先生伯循實

爲銘著公世次及細事明年丁亥吏部君走使如鄴
請其里生銑再揭大節表諸墓上闕幽志鄉範云

與賀中冷司寇

高弘圖大學士

僕近見黔中人稱李二水爭水西事歷歷拂袖歸田
焚香送者萬餘人至龍里爲立祠冉江春秋俎豆之
視蘇文忠所稱孫君介夫何異哉然二水昔在郎署
時挺擊亢言貴戚氣奪乃知剛直之性本自天植耳

與李大叅老師

張明弼揭陽知縣

黃貞父程墨選愚東二作俱收人謂貞父酷慕愚東

北昌歎羊棗之嗜某以謂大官五侯鯖恐染指者不獨貞父也

與李大叅

劉宗周左都御史

水西事自足下發之今夜即知有漢大豈止與邊臣論是非哉近劾執政疏即鄭懈鄒浩不啻也敬服敬服

土地祠寅賓館碑記

孟楠縣令

夫民神所依也夫神民所體也事神弗虔何以圉民君子之至於斯也吾未之或見也政其闕諸猥云未

能事人焉能事鬼時惟弗欽溺其職矣高賢大良詔我以得失俾益我者弘多我且有違心曰吾得以仕學也彼其言采葑采菲無以下體聖人何擇焉以人廢言得無訑恃我聰明而我聾瞶恃我智術而我短淺夫理人者將昭德塞違唯益是求出以照臨百姓百姓象之無有二心不以煩言恃已凌人又何學焉邑舊有祠以祀土地穢焉不治羣豎交走神之靈矣蒼昊是安賓館肯焉狹而臨衢先人後神序之紊也不可以訓改祠于前闢館于後庶得其宜遂爾鳩工

遂爾庀材取諸自理不以煩民民其與我朔而謁神
以職告也望而謁神以職告也吾修吾職無作神羞
職之弗修內疚于心神卽弗譴心無忤乎而况洋洋
如在其上不可射矣所以延賓 從晉接儀文維茲
千乘古實渤海厥戶五千厥口三萬厥田九千厥賦
四萬有奇厥俗刁悍非其天性習實使然是蔗是菘
厥有農夫是經是營厥有商旅世守一經厥有士人
百務鱗集待理一人不有忠言所失孔多繩而糾我
是吾願也諛而奉我聽之而已朝聞一善夕必行之

夕聞一善朝必行之所獲不旣修與葺祠逮館烏可
緩諸嗚呼神人一理也敬神禮賓一心也吾人非敬
神之難無愧于神之難非禮賓之難無忤于人之難
畫之所爲夜必告天畏神也無事過人無事弗可語
人畏人也畏神如趙氏而後無愧于神畏人如司馬
氏而後無忤于人彼二賢者豈絕德哉希賢則賢慎
所畏耳吾小心翼翼照事神明則神監我矣應人以
人不以賢先人則人監我矣神監我而我無愧則神
悅而民獲其佑人監我而我無忤則人悅而民見其

情其于邑也何有是神人交監不在乎他在我一心
余不敏兢兢焉日從事于斯二者惟不逮是惧故扁
其門曰神人交監以自警云是爲記

李署爛鑿錄序

成 勇御史

刑者聖人不得已而用之者也民命之生死國祚之
促延俱於是乎係刑而可以輕用乎哉刑不可以輕
用則刑官亦不可以輕設邑獄決於令郡獄決於守
省之獄決於臬天下之獄決於大司寇則司李之設
無乃贅乎曰非贅也外之司李猶內之廷尉蓋專主

出不主入專主生不主殺此先王設李官意也後人
不識此意不以司李爲恤刑之官而以司李爲用刑
之官欲入是人也則必曰惟司李可以入之欲殺是
人也則必曰惟司李可以殺之而爲司李者明知其
人之可出不可入也恐其出之上以爲枉法亦姑從
而入之矣明知其人之可生不可殺也恐其生之上
以爲徇縱亦姑從而殺之矣抑思夫入者不可復出
殺者不可復生行一念之殘刻以傷數人之性命借
數人之性命以全一已之功名忍乎哉且夫一已之

功名究亦何能獨全也揣上意以定罪而意外之磨
勘正多違人情以論囚而絕情之福澤必損寧惟功
名不全室家因而淪喪者有之子孫因而滅絕者有
之則何如定國爲廷尉以多陰德而大于氏之門歐
陽讀爰書以求生路而興廬陵之徂乎吾故願爲刑
官者慎之也雖然刑官之慎不慎其禍福止及於一
人用刑官者之慎不慎其吉凶遂及於天下昔周公
告成王曰司寇蘇公式敬爾由獄以長我王國夫周
官三百六十屬無人不可有惠民之政無人不可有禍世

之思而長治之休徵何獨歸功於司寇卽周公又何
必兢兢焉獨以司寇之式敬爲成王告也蓋天道好
生而惡殺民情喜生而懼殺人主一念哀矜則人臣
亦莫不哀矜無窮之生機動矣卽天命民心之所以
永固人主一念殘忍則人臣亦莫不殘忍無窮之殺
機伏矣卽天命民心之所以靡常此情理之必至者
吾故願刑官慎之尤願用刑官者慎之也余初筮仕
得饒州司李以艱去補開封再以艱去補歸德蒞任
凡十二載其間大獄數百小獄數千每定一案必反

覆推詳求其無憾於心而後止今循例報最蒙聖天子崇召入都恭候考選閒居無事一時新進之選司李者咸向予問一言予曰我李官恤刑者而非用刑者也專主出不主入專主生不主殺得是意而存之其亦重念夫刑之不可以輕用也因取古今慈吏之所以得與酷吏之所以失者彙成一編人爲校評事爲論斷題曰李署燭鑒錄亦庶幾使後之人嘗存此不得已而用刑之心焉爾崇禎丁丑三月書於長安齋中

消閒錄序

前人

余坐卧此樓寒暑倏三易矣讀陶詩飲杜酒樂乎憂乎人不能爲我解我亦無能自解以爲憂耶清風入廬明月偕吟一唱三歎之餘未始不曠然自得以爲樂耶歲時伏臘之夕鷄鳴風雨之晨悽悽切切忽不知其所思者此何心嗟呼日月空長私衷徒結終朝開閒何物可消偶於几上檢前賢之緒論信手抄錄任意發揮自屬無益聊以消閒云

孫孝子贍族義田碑記

鮑鳳仞本野合

族之名何昉乎昉于服也服以內服以外繩繩蟄蟄以似以續按譜而索之譜各有系循名而考之名各有稱推而遠之何人也引而近之卽我也亦非我也實吾祖吾宗所分形而其氣離裏而屬毛者也譬之水千流萬派猶一源也譬之木干霄拂雲猶一本也然則夫人而不于原本之是務也夫人而必于原本之是務也將得不爲至孝人乎哉嗟嗟至今日而求爲至孝人者舍孫生三錫又誰是孫生孝行卓冠古今諸如事親冬月禱魚出費下親沒廬居茹淡絕五

味十二年至性絕誠事載傳紀者未易更僕數行將上徹宸聰壘書褒美且日暮下不具其獨是甫議建學旋商贍士義捐七里莊田地未已也復聚族而謀曰唯茲子侄孰非吾祖若宗數十傳而及于者乃坐視其寒無襦饑無粟而不一援手救則是子之責也夫是子之責也夫子幸節腹量口積有薄業盍舉族以公之則董家庄二百七十畝石家庄一百一十畝勞家庄七十畝杜宋庄五十畝義田大地五百畝之設所由來也余于此不能無三嘆矣世風日下鏗

刻相煎諸如借父耰鋤慮有德色母取箕箒立而諄
語彼豈獨非人者且至親如手足平居笑言讌讌絕
不見憤心愼色遇小小索求輒覺起鬩牆易面反舌
如不相識卽父子兄弟之門而猶有慚德矣况彼系
出宗祧遠處踈族其不視而爲塗人角而爲胡越者
幾何也今孫生獨否否見人之習于媮也義田設而
緩急可以相恃矣寧復有長者嘆離居幼者嗟溝瘠
乎而孝友之道敦見人之習于薄也義田設而彼此
可以相周矣寧復有嫁娶而苦後時歲時而憂乏祀

者乎而媮睦之誼著見人之狃于目睫而忘其遠圖
也義田設而風施可垂示禍患可少免矣寧復見敗
類之徒有所資而復爲惡孝秀之子有所藉而不日
進于爲善者乎而忠義貞廉之俗成至是而上溯高
曾下迨雲初雖云曠代儼若同堂家傳敦睦之風世
守廉讓之訓百禩而下使子子孫孫莫不追而誦之
曰非吾家_某翁之良法美意有以垂後不至此以視
夫身擁素封列鼎鳴鍾摧戕同氣炫耀宗服卒之不
一一傳爲高明鬼瞰或來盜賊之侮多藏厚亡徒供

逸樂之資究其所得孰多孰寡誠必有能辦之者矣
搃之孫生一至孝人也無事不從本原起念觀其解
衣推食真有不啻推心而置腹者若曰必如是而後
有以安吾親安吾親而後可以告無忝于祖宗也詩
曰孝子不匱永錫爾類孫生有焉若夫族人中有壞
成法背遺言陰圖利已侵奪貽飢則余輩何難現宰
官身而爲護法

孫氏捐修學宮捐贍士學田碑

陳嘉善

青州道副使

嘗謂爲善於鄉樂施不倦人情亦優爲之然有始鮮

終亦止圖其小者近者誰復計其大者遠者若乘邑
孫生三錫則異是孫生者世業青細力敦孝義規行
知步綽有古先哲之遺躅焉其佗周孤恤寡掩骼埋
髑葺橋梁繕舟楫種種熈行未可殫述獨其見學宮
之頽廢毅然力任思所以鼎新之而又慮年遠歲湮
未必不日就傾圮且顧此濟濟多士雖不以溫飽自
期待然使家無斗筲而與鳴琴之在室能乎于是捐
金一千五百兩有奇以脩學宮復有男貢元孫弘姓
廬江縣知縣孫弘詰儒童孫弘愚捐銀二百二十七

兩六錢侄貢生孫希奭捐銀八兩五錢生員孫弘敬
捐銀五百四十兩儒童孫弘葵孫士潔捐銀二百四
十兩孫進士孫清捐銀十二兩同捐者則有舉人劉
毅志捐銀十兩生員成其懋捐銀十兩用繼度支也
本生復又義捐到壽光縣七里莊大地五百畝以贍
士數月來計公議創建者則尊經閣圖書府翰墨林
輪奐一新重脩者則明倫堂西齋房東廡戟門櫺星
門東西義路禮門名宦祠鄉賢祠前後各角門園墻
文昌閣奎星樓規模倍廓成工固昭昭人耳目間矣

惟是捐膏田以贍庠士余有慮焉凡天下事興一利
必有一害好義者爲之必有好事者從而壞之今茲
贍士之舉有兩利也亦有三害也何言之田設而士
之貧不能舉爨者衣不免鶻結者欲敦說詩禮而膏
火無資者咸于是乎給之矣邇來支狀纍纍將人人
德孫生之推食解衣而復嘉與後進也利一田設而
士之貧不能舉爨者殿廡之摧剝垣圍之塌裂塗暨
丹黃歲無虛月使廟貌重新觀瞻永肅百世而下景
行仰止孫生儼在利二若夫可慮者則一在豪強之

影占阡連隴結有如繡錯萬一隣封遠隔世代曠邈
土棍從中包攬陰爲侵蝕勢豪巨而撓阻顯圖霸奪
未可知一在胥役之中飽收藏出入其爲鼠雀也多
矣間或有一二費蠹謂是可畏而取也不肖之官吏
又因以爲利驟混侵銷獎難枚舉或徵收有數侵耗
無數或按有人而支領無人未可知一在當事之綜
核夫綜核者未嘗之漸也亦提繳之漸也在孫生慷
慨好施雖不吝割膏腴之壤以贍貧窶亦可謂世守
勿替耳而後人視之則曰此公田也公田則爲公帑

公帑則有公費一時或嘆爲盛舉設數十年後年無
藉口剔弊釐奸而碑檄紛 漏卮難塞者平其之貽
累不堪或盡捐以奉上亦未可知若此者皆然公之
罪人費序之蠹賊也於赫

先師靈其殛之若孫生之百行備美掀髯長嘯託爲戲
天履地竟不能等之人数猶其後焉者矣總之故自
古誼扶進後學惟恐一士不獲其所者鄉祭酒之事
也護持善長誅鋤敗類能俾遺澤流風永傳奕世者
更有司賢大夫之事也凡百君子尚其敬而聽余言

是爲記

孫先生格魚傳

黃甲雲本縣令

孫先生諱三錫字懷萬別號梅庵山東樂安勅封公也其父勅封澤寰翁於癸酉臘月廿七日終於正寢其母丁孺人悲號哀痛隨致篤疾不起先生侍奉湯藥晝夜不交曉常焚香祝天求以身代母一日母思食活魚時嚴冬雨雪水凍冰合不可得先生以不能遂母意悲哀無已露禱於天忽有活魚躍於爨下鱗色迥異見者驚告先生先生持以奉母母見欣慰

疾遂瘳母不忍食命置魚盆水中泳躍洩旬水不復凍母命先生投魚於河魚浮水面不去先生復以不忍食生魚告魚乃逝去母亦自是康健此甲戌臘月事也一時成神其事以爲純孝所感格云先生賢人也嘗另有列傳行世此特表敘其純孝格魚之一事焉耳

樂安令黃生論曰古孝子格魚有卧冰得鯉湧泉躍鯉三事今得孫先生爨下躍魚一事而三矣孝哉孫先生與古人並不朽也無寧志魚水族也水之下泉

之中魚所在也水解泉湧魚出於內常也未足奇也
至於爨下則火所在也卽燼而爲灰亦土也尅水者
也水當之且涇魚何自躍於中乎今孫先生純孝感
格魚躍爨下此千古未有之奇事有非卽水湧泉二
事所得同日而並語者稽先生爲人在三代以上諸
如修學完糧修橋梁道路置義田贍士恤族種種懿
行義比古人而於事親爲尤孝居恒視膳問安必定
晨省克盡其禮旣葬廬於墓數易寒暑哀慟如一日
其樂義而又純孝如此謂天地間無鬼神則已亦有

鬼神未有不爲孫先生呵護者鬼神呵護孫先生先
生有所惡必爲之去之有所愛必爲之護之有所敬
必爲之重之有所思必爲之致之此必然者也孫先
生之母思活魚時不可得孫先生致禱活魚躍於爨
下以答孫先生之誠此自然之應也於爨下何非擇
地而處隨地而出也若曰雖於爨下可也無地不可
以躍魚也孝之至也孫先生平日爲人可以質鬼神
而純孝又加於古之純孝子一等所以躍魚爨下視
古孝子爲猶奇一邑有純孝而不獲表揚於天下此

司風教者之恥一時有奇事而不獲傳聞於後世此
一時司風教者之恥余謬任樂安詎敢溺職而令卧
水湧泉二事專美於前乎

過龍泉寺感懷

李中行叅政

廢殿荒臺日影斜少年曾此伴袈裟
疎鐘月落聞初地古樹風迴澹暮鴉
寂靜不教聞梵語蕭條無復見
僧家我來幸謝風塵日好向空門問法華

白紵辭

前人

金叵羅玉顏醜青琴妙舞絳樹歌
千金一笑豈足多

輕 秋水逝微波徘徊問月影
婆娑綺窓繡戶儼曲阿芙蓉
菴源柰樂何

送愚東侄守荊州

前人

領郡當名勝分符亦壯遊
依違非我性僑疆已招尤
於世既無濟眷身宜自謀
蒼茫一回首迢遞起深憂

家園雜興

前人

西風裂紙夜颼颼歡去何曾半
日留翹首不來花影盡隔
廉人唱白符鳩

洋溪閒眺

前人

曉起枝節到遠林通幽一徑白雲深野人自愛葱蒨
色閒對春泉洗道心

前

前人

澗草汀花路不迷踏青又過畫橋西兒童拍手歡相
語驚見鳩鵲浴小溪

與友人

李 楫知府

某河洛禹貢解葺在花之寺蓋愍學者不達經意而
師其所悖卽日誦經義其害反甚於揭竿相向者如
謂秦人焚經經存漢人存經經亡蓋妬口之甚爾

題舊畫

前人

兩峯爭欲合一水劃然開樹自懸崖出人從絕壁來

卧石樓夜雨感懷與張瞿堂 徐振芳文學

暝雨入高樓寒聲到枕幽飄蕭纔半夜淒冷已深秋
驚電窺窓去低雲貼樹流長風空颯颯殘漏歷悠悠
繁響牽孤緒無眠集自憂向誰歌郢曲何處試吳鉤
燭武無能老張衡有賦愁不才應落魄同輩已封侯
縱酒因而病攤書顧亦羞乾坤容我處烟水滿滄洲

閔邑澇

前人

巨鰲駕滄海笑兀當空立猛風排蕩蕩簌簌驚濤泣
屏翳與豐隆凜之游蒼穹盡吸尾間波囊括上鴻蒙
溼烟塞天路驕陽匿不起靈響怒相攻電驚望舒死
淡旬復彌月無日不淋漓好秋將納稼一旦委淪漪
孤邨聚歎息萬井斷吹烟尚有蕭疎樹微分水與天
野老勤終歲不得飽糠粃鬻子了徵輸饑腸照空水

送李二水先生監軍

前人

到日春光應未闌蠻花如錦映材官幾行征雁排雲
度萬里孤臣掩泪看千騎弓刀當夜肅雙龍風雨度
江寒不堪北望三湘水雪浪如山尺素難

晉宮詞入玉臺新詠

前人

夜夜空庭望女牛綺窻人靜數螢流羊車又過宮門
去斜月疎桐一院秋

修城隍祠敘

歐陽焯本縣令

焯不佞受事漢先博士司徒之壤緬焉興懷於懷詎
惟邑崇者賢者暨耆父老壯佼子弟予著筴奉而亞
旅聯哉悉動植諸產予苞藟也近坳垣之無良帑而
颺版而騰瞽目縮手不可鉤擿吏苦民瘦不佞慄慄

危懇自朝至於日中昃弗遑幸也罇苴類釋以告於
職歲寐寐我思絜孰啟翼之克至此矧比歲澤不下
及首種不入滌惡民跽日騁靡知攸屈茲者落其實
取其材譌大田矣迺雨雪陽止驩然卜來歲之芟猗
嗟絜誰誕賜而罔念厥繇於是籲衆在庭而諗之爾
衆亦知夫職明職幽之昏相協爾乎曠潦螽蟥之沴
能謀其備不能辭其至敢擣泯焚以敗我修良者矣
不執而辟寐不可惕而戢也疇攘以除疇詭隨勿克
縱叢爾吏上功名於

帝帝之神之貴者未數數然也敘功名於有土暱民之
神維帝闡闔是啟圜則九重營度之不得而億也有
土暱民之神爵眎五等旒璫裳衣旂輅眎爵則必有
伉其門有跂其屋輝如砥如其夾祀納陛珉城乘石
俯仰焉左右焉洋洋於彼於此先王求諸陰以立治
營度之不得而媮也爾衆將若之何於是薦紳大夫
髦士握纛誼以告僉曰隍哉皇哉山林澤藪之能興
雲雨蓄泉源祈實利用者邑各異望望各異秩故魯
人不事滹沱齊人不事配林惟神彞祀通天下社承

邑隍邑承郡郡承藩以達於畿將有蒐狩學圃之事
社修其鼓鐸旗物帥而至社公皤齒偃僂趨受職惟
謹亦猶鄮鄙閭族之聽於令也若之何其敢弗圖攸
芋以式厥瞻吾儕莫不有墀戶穿窗違寒暑以居顧
神所馮依楹楠丹雘而弗斲弗塗坊庸郵表曠之報
若也若之何其敢不單出竭作日勝兩馨鼓抑聞諸
君子之將有營也必先廟而後室所以昭儉示讓也
令視乘三年芟舍而聽尚綴於園橋之偏外之階屏
不足以列史胥廂序不足以貯圖牒內而數百指學

蠶房之懸恬然安焉究不肯一櫨一冶徵於乘惟講
葦籥翽舞諸令典戒董勿稍徇若之何其敢不聰廼
聽而明幽交媾卽惛以府咎也或言城之爲言盛也
君子大容畜隍有基勿壞君子厚下安宅也允若茲
繼自今氣和而殖阜訓宣而又從鹽絺鉛石壓絲諸
貢篚案夏后氏之經樞劍幅舄琴瑟誦罍紹漢儒林
文學蔑不及是神與令申複大有造於乘也永無諉
哉不佞聞而拜手曰諸君子善誦誘哉辭之輯矣神
之懌矣爾衆之廸矣爰書於冊代道人鐸焉

連海崖小紀

載岳州誌

連公應鄭字海崖青州樂安人戊戌進士倜儻有經濟才授岳推官

康熙初王師屯西山中丞俾公輓漕岳陽粟守汛壘色不少變嘗遇民夫三千轉運至水漲不得渡公伐竹治大纜募善泅者掛兩岸得渡瀏人李應鑄善屬文捐潔公引爲布衣交使吏人上其塚初岳城苦火南郭尤甚五年四焚公見南樓榜迎薰樓三字謂父老曰火位於南今薰於文爲二十重火而迎之可乎乃改爲甘雨樓不復火

草橋路石橋記

鍾羽正工部尚書

夫極一方之患建不朽之工毅然捐重費以濟人而毫無吝色此其擔當措置必有大過人者甚非庸俗鄙薄者所窺測也庸俗者守田廛握囊篋便于已則圖之視蒸人辱于泥塗若秦越然一足一手且將吝惜矧能慷慨揮霍拯大患建大工哉予嘗思一弘邁士不可得乃今于千乘李公見之千乘者吾郡名邑也北有草橋去邑二十里爲登萊燕薊通津每夏秋

瀑水泛溢行旅車徒提携負戴方舟厲揭濡溺憂虞
莫不疾首嘆曰安得大度仁人爲橋濟此者乎鄉三
老計工甚鉅非數千金不可卽旦夕奔走募化何能
猝辦以故因循未舉大叅李公過而憫之慨然曰是
不足憂三老不佞忝簪紳竊升斗祿兼力田所積莫
爾不腆靡敢自私試罄囊以就橋工庶有濟乎于是
鳩工庀材陶灰輦石相圩岸築基墉爲石橋二長十
三丈寬丈有六尺高堅廣濶虹跨虬蟠龜蹲鰲負南
北過者如履坦途無病涉者詢知公所建成祝之曰

此李公橋也自癸酉三月十九日啓工至七月四日
告竣凡費三千餘金皆出自橐中不外募公之大施
設大擔當無少愆吝豈尋常淺淺齷齪局趣鄙薄者
所窺測哉公家世令德自封公施仁秉義獨行著于
郡史公秉彜天植居官執憲不吐剛茹柔有回瀾砥
柱之節執親之喪齊衰廬墓於鄉黨寬慈仁飢者食
之寒者衣之疫病施藥餌回生甚衆捨棺掩骼遠邇
頌德公春秋未艾令得柄用正直忠厚爲世津梁捐
上益下民悅無疆功德所積福祉駢集子孫修業奕

世康濟顯榮豈特一橋之頌已耶予老詩八十所矣
久不搦管嘉公之德因鄉耆固請依行者所稱遂名
之曰李公橋而爲之記

附與友人

李中行叅政

歸田來築小園誅茅結籬消遣永日回視渡黔水來
時真若槐安清夢矣吾鄉固多雋友日與之盤桓頰
仰發篋讀古籍硜硜自好有朱翁建業者年八十善
飯篤躬願放視八不居士彭生翔臯英髦有足取者
論曰邑前志載藝文稱備矣余讀之惑焉見內史三

頌西京文最爾雅其目次不載而僖父語紛紛則何
說哉豈以內史詞近諛少短歟綦將軍碑又不當全
錄也愚谷集藉弁州序爲重軼之恐非太僕公意耳
李主簿才詩選入皇明風雅顧志不一列其名果隘
于所見聞歟余更不知所解矣今函取之著于篇俾
後之人得以覽觀云

樂安縣續志

市廛

癸卯來丘火頻仍村墅互易貿鬻之區因以廢興焉
志市廛

城內外原五集今東南兩關中大街集俱廢西關北
關猶存而西關更盛昔時

郊外集場廢者宋家店延家集乾淄河店新增李家
橋六股路蘇家庄廢而復者稻庄散水口餘如故

樂安縣續志

學校

乘自國初來百曠未舉學宮蔚然稱備甲諸州邑矣
績以不隳弘之在人

大成殿知縣鮑鳳仞倡廩生唐德晉生員孫弘敬等
重修

明倫堂 東西廡 左右齋房 庫房 東西角門

櫺星門 戟門 垣墻 義路 禮門 俱邑人孫

三錫自出貲繕修 尊經閣 周公祠 奎樓

文昌閣 學東齋堂 學師宅 俱邑人孫三錫自

出貲創建 學田千畝 邑人孫三錫自出貲立贍

士

名宦祠

鄉賢祠 孫三錫建

啓聖祠

論曰按舊志學建自黃令鏗鏗宋崇寧間令乘耳七八百年而遙今視其基湫隘間有所修築亦第易濫漫飾丹堊止耳豈能恢廓如今日者哉更樓有舍養

有田士藉以引篋橋門聽鐸鼓焉李廌曰堂翼如櫺櫺如學者賴以作聖由斯以觀孫公三錫之功不偉然遠歟

樂安縣續志

秩官

乘自癸卯來令斯土者靡不悉而學博丞簿尉或闕焉豈非以邑疊遭兵燹典籍彫殘使然歟語曰遠疑誤軼疑誣况昭然垂永者哉

知縣

孟楠北直濬縣人萬曆戊戌進士

麋有象山西繁峙人甲辰進士

許邦興北直魏縣人進士

陳秉良廣東人舉人

陳來賓河南人舉人

張文熙北直景州人進士

丘雲程 人舉人

楊名時河南商丘人進士

門洞開北直安平人進士

胡克開四川隆昌人進士

黃鎮元河南商城人舉人

高 任湖廣武陵人舉人

呂 業陝西寧夏人舉人

朱芾煌南直無爲人進士

潘必鏡北直延慶人進士

喬尚質山西襄陵人舉人

朱朝攤河南祥符人宗貢

張直講北直曲周人舉人

清朝

張弘猷遼東寧遠人貢生

張遵讓北直肥鄉人貢生

蔣元彥江南上元人貢生

張暉山西祁縣人進士

鮑鳳仞江南無錫人進士

黃甲雲河南襄城人貢生

蕭永華遼東遼陽人官生

章志尚浙江孝豐人貢生

歐陽焯湖廣潛江籍安福人進士

縣丞

黃表中人

陳耀浙江人

譚言順山西大同人

孟魁人

主簿

唐有陞江西人

姜邦俊浙江人

郭新寧夏人

郭萬年北直大興人

典史

張 祿浙江人

楊 誥陝西人

李世慶山西人

冀 俊山西人

清朝

陳至本 人

沈可達浙江人

朱應兆北直人

史茂芳陝西鄠縣人

教諭

張夙行掖縣人

趙 寬濟寧人

劉光岱濟南人

苗 淳北直人

許士髦 人

陳于明貴州人

艾廷獻雲南通海人舉人

白如瑜遼東人

張其先福山人

郭拔萃泗水人

清朝

張鳳墀長山人

任夢龍掖縣人

李含芳武定人

孫汝玉文登人

訓導

龔光祖人

王世參曹州人

王琇瑩曹縣人

衛三讓山西曲沃人

李珠齊河人

劉之秦河南林縣人

李承詔昌邑人

高梓濰縣人

龔懋修嶧縣人

岳毓傑曲阜人

清朝

郁燦然文登人

孔胤楫四氏人

李俊英霑化人

張重暉萊陽人掌印訓導

楊賦亨聊城人舉人益都教諭署訓導事

論曰令如麋公有象之廉察綜核幾矣廣漢翁歸楊
公名時張公文熙文學飭吏績朱公帝煌高公任風
雅淹博振揚士類有足紀者它如潘公必鏡張公直

講黃公甲雲章公志尚有雋聲余更慟蔣公元彥之
死官死事云

樂安縣續志

選舉

邑自洪永至隆萬間二百年進士才七人何寥寥也
鄉薦雖頗多率浮沉下寮不副其志氣癸卯來科目
彬彬孝廉十七售南宮豈非太僕郡守兩公駿學鴻
名有以倡導之歟士顯經術卓越自好又奚可以逢
年論哉

進士

萬曆庚戌科李中行貴州叅政有傳

己未科李楫中行侄荊州知府有傳

陳可薦戶部主事有傳

天啓乙丑科成勇南監察御史有傳

孫三傑太僕寺丞有傳

崇禎丁丑科劉業嶸元氏知縣

清朝

順治己丑科孫弘喆三傑侄廬江知縣

壬辰科尹從王嘉興推官

戊戌科連應鄭岳州推官

辛丑科成其範兵部觀政御史勇子戊戌會試

劉毅志吏部觀政

康熙甲辰科孫清副總兵弘謨子己亥會試

舉人

萬曆癸卯科李中行見進士 傳應商寧津知縣

丙午科李楫解元見進士

己酉科李鳳翥樂亭知縣

戊午科孫三傑見進士 陳可薦見進士

天啓辛酉科成勇見進士

甲子科鄭國俊青城教諭有傳

崇禎丙子科劉業嶸見進士

巳卯科張所好有傳 羅養心有傳

壬午科孫弘喆見進士

清朝

順治戊子科尹從王見進士 連應鄭見進士

孫清見進士

辛卯科成其範見進士 劉毅志見進士

恩拔貢

連守度鎮南知州晉階朝列大夫有傳

天啓成勇見進士 張三鳳 劉業嶸見進士

崇禎安行 李含章巳卯副榜候選州同大叅子

清朝 劉之董候選判官 生超南和知縣 孫三錫

有記 成其謙 孫希奭吳堡知縣 李士升

歲貢 徐讓 徐順 徐諫 徐禎

萬曆連芳 慶惟永 邵養愚 賈思誠山西山陰

知縣 傅汝霖武定訓導 連守矩 許可教魚

台教諭 賈應忠紹興訓導 楊春召 張爾功

天啓連守範嘉祥教諭 郭養朴棲霞訓導

崇禎蕭宰高密教諭 朱道明黃縣訓導 張聖允

張聖教 張聖訓萊州訓導

清朝

郭心印贛州同知 劉學亮長沙知縣

倪家標樂陵教諭 孫三策新城教諭

蔣 禧蘭陽縣丞 鄭時俊利津訓導

成 斐淄川教諭 孫弘牲麻城知縣

蔣 璉泗水訓導 鍾補闕 王昌祚 鄭應甲

樂安縣續志

名宦鄉賢

禮有功德于臺則祀之鄉先生沒祭于社爰昭民秉以綏奕禩鐸鼓其鏘邊豆有簋乘弟子所觀聽也志

名宦鄉賢

知縣黃公鎮元河南商城人舉人

行太僕寺少卿程公鳴伊

武定學正鄭公養性

封文林郎寶雞知縣孫公儒忠

貴州叅政李公中行

太僕寺丞孫公三傑

荊州府知府李公楫

戶部主事陳公可薦

昌黎知縣張公孔思

鎮南知州連公守度

甲子舉人鄭公國俊

思恩經歷李公貴和

樂安縣續志

丘墓

大隱之山名賢棲真樵牧禁焉永之世世志丘墓

歐陽八世墓載舊誌今裔孫焯令樂安重立碑置祭

田春秋二祀

孫寺丞三傑墓在城南十里李大村

陳通判蒞墓在城南十里

成侍御墓勇在城西南五十里臨淄境內桐林村

連州守守度墓在東郭外

陳主政可薦墓在東郭外

蔣孝廉奇錡墓在北郭外

李叅政中行府楫墓在城東南二十五里洋水東岸

論曰古鉅人碩士生有居葬有壙典籍載之重所存歿也乘歐陽八世墓琅槐之區學者望爲歸墟焉邑西南行直寺丞過乾時弔侍御愚谷下繞洋織北阡讀曹鍾兩大司空傳民部所置碑又慨然有感矣

樂安縣續志

援例

入貲爲郎在漢已然大者至分家財半佐邊致尊顯至御史大夫勲伐爛焉曷至今絕響也邑貧瘠士敦古行而短于財清門望族出貲力佐縣官緩急策名踐廡車服有曜一時之遇豈可漫漫哉志援例

李中立武英殿中書舍人

孫三元武英殿中書舍人

連士英鴻臚寺左少卿知州守度子

畢自牧湖廣布政司經歷鄉飲大賓

李貴和思恩府經歷入鄉賢

張述顏漢中府經歷

姜夢芝綏德判官

畢自新太原檢校

孫忻桃源縣丞

張爾極桃源縣丞

尹樂虞錢塘縣丞

王思聰輝縣主簿

張素雅寧羗吏目

蔣璞廩監舉人奇罇子

房文秀陳州同知

宋宗禮鴻臚序班

畢自修縣丞候選

監生

李鳴和 姜紹禹 王家杞 王家標

鄧九官 鄧九合 蔣奇鈺 傅策勲 傅彞勲

傅暨勲知縣應商子 禹之讓 宋夢瑞 禹之績

李曇章中書中立子廩生 朱建業沁州吏目

儒士

姜夢萃 王家禎 姜夢蘭 姜一元

論曰勝國啓禎間官人重資格士不中程鮮獲執尺寸之柄以見於世中翰中立三元臚少士英委蛇殿廷容與鸞禁而士英典郊祀宗廟函陵儀制侍命太乙榮矣非施不克竟所處則然也至于六館之雋尤無顯遇或仕或不仕大抵為澤不為川矣中如李鳴和之馴雅姜夢萃之篤謹王家祀之慎重王思聰之

恬靜深醇鄧九合之慕義樂施侗儻自修所謂軼其儔類者耶

海

海峽圖書

